

四庫全書

史部

欽定四庫全書

史部

關中奏議卷十七

詳校官侍講學士_臣法式善

編修_臣裴謙覆勘

總校官進士_臣繆琪

校對官中書_臣王家賓

謄錄監生_臣何均

欽定四庫全書

關中奏議卷十七

明 楊一清 撰

提督類

一為整理邊務以備寇患事

欽差提督陝西三邊都御史臣楊一清謹題為整理邊
務以備寇患事案查先准兵部咨該提督軍務兵部尚
書金獻民題前事奉聖旨該部知道欽此欽遵該兵部

議得固原地方平坦可以馳驟敵衆搶掠多由此入陝西腹裏州縣連歲被害實由本處兵糧不足難以防守合無依其所擬將各城堡各衛禦冬防守官軍內選擇精壯二千三百員名連見在七百名共轄三千員名聽總兵官統領其守備官部下除見在并各城堡挑選官軍二千員名外許於各項軍民丁多戶內召募一千名共轄三千之數召募銀兩於官庫動支俱各相應但事關地方軍務仍咨行提督尚書楊一清再加議處具奏

施行等因具題節該奉欽依其餘准擬欽此欽遵備咨
到臣為照固原為陝西喉襟要害之地地里平漫無險
可據通敵去處甚多自弘治十四年以來套人擁衆深
入延寧地方不能捍禦馳驟長驅兩日夜可至固原分
散醜類靜寧隆德會寧安定一帶州縣俱被剽掠直抵
鞏昌秦州地方近年又侵過平涼蹂踐我涇邠等州縣
得利而歸不曾遭剽將來鳳翔西安內郡安保不遭毒
害臣先年巡撫之時奏將陝西鎮守總兵移在固原常

川駐劄意正在此但所統官軍與守備官部下官軍俱不及千數委的數少難以出戰只得嬰城坐守甘受畏縮之罪今提督尚書金獻民要將總兵官部下除見在七百員名外再於各城堡各衛禦冬防守官軍內摘選精壯二千三百員名共轄三千員名總兵官統領守備官部下除見在外今擬增糧并各城堡挑選共二千員名未及之數照例懸賞於有丁人戶內召募一千名亦轄三千之數統領殺敵召募銀兩於司府官庫查有無

碍銀兩動支除依擬行令嚴加挑選聽各官統領以助
兵勢外至於懸賞召募一節尤為得策今日之務似難
舍此及照臨邊軍民勇悍善鬪者在在有之召之有道
自然應命及查先年召軍每名有給銀五兩者有三兩
者是為常守之兵比之腹裏抽選召募者大段不同比
年延綏寧夏二鎮召募土兵至今與遊奇正兵一體調
遣截殺所向有功今各該衛所行伍空虛懸利召募相
應舉行但陝西布政司在庫銀兩不多各有頭項難以

一槩取用已經具題乞勅兵部議處合無於太僕寺馬價銀內動支五萬兩差官運送前來聽臣督委都布按三司實心幹理官員設法召募不拘衛所軍餘舍餘村野土民但係年力精壯騎射開熟者籍名在官願領馬者給銀五兩步軍給銀三兩令其置辦軍裝弓矢器具團成隊伍聽總兵守備等官統領訓練不敢委用貪刻官員用強逼勒以失人心亦不敢濫收不堪之人徒費官錢無益於事若京運銀兩召募支用不盡收貯聽發

各邊收買戰馬不許別項動支事完通將支用過召募
買馬銀兩數目造冊奏繳等因題奉聖旨兵部知道欽
此欽遵兵部議擬覆題奉聖旨是馬價准動支五萬兩
運送前去募軍買馬不許浪費欽此欽遵續該兵部差
委太僕寺寺丞張琬運送馬價銀五萬兩前來除行仰
帶管固原兵備叅政成文轉發固原州倉收貯聽支外
續為諮訪羣策以裨邊務事據固原兵備副使成文呈
稱固原東路撒都城即白馬城委係緊要隘口雖與清

平苑草場交界然地處孤懸久不在彼牧放相應修築
城堡斷絕敵路以保地方且彼地頗肥饒可作安軍之
業防守軍役照先年事例召募懸賞仍撥給近堡地一
頃令其開種待十年之後量徵子粒仍將白馬井墩改
築近水去處展築寬大月城有警撥軍在彼占據水頭
使賊馬不得飲水則賊路自可斷絕等因到臣節經依
擬勘處施行完備除另行具題外為照陝西各邊衛所
軍人逃故數多行伍空虛丁力寡弱遇警應敵多無成

功茲欲充實軍伍不過清勾抽選召募三者而已但今各該衛所多無空閒人丁每正軍一名例該二丁幫貼尚且不足抽選一節似難舉行清勾固是要務已經出榜召諭逃軍令其自首免罪及督委都布按三司清軍巡守等官各督屬挨查清補但地方廣遠州縣數多一時豈能濟用惟有召募一策可應目前之急蓋西人性氣猛悍尚勇善鬪且慣見敵衆聞敵不懼若召之有道自然樂從案查近准兵部咨該提督軍務本部尚書金

獻民題為整理邊務以備敵患事要行照例懸賞於有
丁人戶內召募一千名聽守備官統領殺敵及據固原
兵備副使成文呈議要於白馬城地方添築城堡改築
墩臺占據水頭以遏敵人但恐各衛所缺軍摘發防守
亦須召募精壯一千名設為常守之兵庶幾可得其力
及照平邊所紅古城二處皆險要地方舊召軍人數少
亦須量為召募每城各二三百名則軍伍稍充兵威自
振查得陝西按察司副使韓士奇見在軍門聽用已經

行委本官專理前事出給大字告示發去固原靖邊一帶城堡平涼慶陽臨鞏等府衛張掛曉諭衛所大小官員有願承領召軍者許赴臣呈告給與鈞帖令其分投召諭不拘土著外戶軍民人等但係年歲精壯有膂力有膽畧善騎射能戰鬪之人聽從召集願投固原平邊紅古等城及新築白馬城者各從其便務要有抵業有隣佑里老屯甲族長戶首保結無碍方可召收待召集數多派發各衛所收隊着伍每名給賞銀兩置辦軍裝

什物合用盛甲於各衛軍器局內關給馬匹於苑馬寺
孳牧及茶馬內領養騎操著伍之後每月照舊軍例給
糧一石其白馬城地方田地廣濶肥饒願領種者每名
給地一頃令其自行耕種不徵子粒就准月糧不許將
幼弱不堪素無根絆無人保管之人一槩混召有損無
益召軍官應該陞賞者先行給與公文執照待具奏定
奪其所召土兵就令原召之人管領聽調殺敵有功之
日照例併功陞職軍官之外若舍餘軍民土人素有力

量能召軍者每名一名給賞銀一兩十名賞銀十兩至百名賞銀百兩以類而推俱照此格節行去後緣副使韓士奇陞任陝西布政司叅政管理糧儲無暇及此改委帶管固原兵備左叅政成文兼管又因成文分守隴右道去訖改委按察司僉事桑溥管理召募查得節據叅政成文呈報願投白馬城軍人固原衛冠帶總旗馬騰召募潘仲教等一百五十三名平邊千戶所正千戶田林召募胡坎等三十一名本所實授總旗田埜召募

張仲玉等三十名固原衛中所百戶甘昇召募趙瓚等
九十一名甘州羣牧所百戶侯松召募權志清等一十
五名固原衛武舉舍人符節召募常英等五十二名總
旗李洪召募謝騰霄等四十名固原衛右所百戶唐璽
召募岳景玉等八十五名平邊千戶所副千戶汪洋召
募殷臣等七十三名固原衛舍人方鸞召募趙懷等二
十一名俱經本官行查結勘無碍開報前來為照白馬
城修築將完缺人防守隨經行令叅政成文轉發原委

築城固原衛指揮符深收管分撥地方修蓋房屋責令
防守外續據慶陽衛前千戶所副千戶繆臣呈報名募
白馬城軍孫玉等三百六十六名前來行仰僉事桑溥
覆審未據回報及據操守固原等處地方指揮使黃振
呈報願投固原衛軍人孟文學等五十九名俱已收糧
發伍外查得固原衛名軍榜文內開奉陝西都司劄付
該蒙巡撫陝西都御史王珣案驗准兵部咨為防邊患
以安地方事該甘肅鎮巡等官都御史陳九疇等題稱

甘肅各衛軍士逃亡行伍空虛不敷戰守要照弘治十五年太僕寺少卿王質題准事例召募軍士等因奉聖旨該衙門知道欽此欽遵該兵部查得先為急募土兵以禦邊敵事該太僕寺少卿王質題該本部議得合無行令少卿王質於陝西甘肅涼州各官庫內查取見在官銀每二鎮共輾五萬兩以備召軍之用若係召募者每名給銀五兩係冊內查出抽選者每名給銀三兩五錢仍免空閒舍餘一名幫貼就與關支糧賞其見任官

員百戶名一百名與陞副千戶副千戶名一百名陞正
千戶正千戶二百五十名陞指揮僉事指揮僉事二百
名陞指揮同知指揮同知二百名陞指揮使俱月加俸
糧一石都指揮僉事名二百五十名陞都指揮同知都
指揮同知名二百五十名陞都指揮使而止若有為事
立功及革職閒住官員能召百名悉與復職該陞官員
撫按官會同給與公文執照仍類總具奏其所召土兵
就令原名之人管領聽調殺敵有功之日照例併功陞

職召募完日通行造冊奏繳等因題奉孝宗皇帝聖旨
是欽此欽遵外今甘肅鎮巡等官又奏前因所據召募
抽選事宜委該舉行本部仍行總制侍郎李鉞并巡撫
陝西甘肅各都御史將見在各庫官銀量數查取共轄
五七萬兩聽都御史陳九疇一面出榜曉諭各色軍民
人等給發召募抽選其該給軍器馬匹及獲功陞賞悉
聽總制巡撫官酌量而行等因覆題奉聖旨是欽此欽
遵外為照召募陞官雖有前例但未知各鎮通行或止

行之甘肅一鎮即今前例曾否停止及總小旗舍人召
軍應否陞授不曾該載今固原等處召募軍人奉有成
命及兵部奏發太僕寺馬價專聽召軍買馬支用似與
先次召軍事體相同但事干陞級未經奏請不敢輕議
及看得各該官舍近召土兵多係有膂力善騎射耐寒
苦善戰鬥之人藉而用之他日未必不為精兵健卒其
素無根絆身力懦弱及干碍正軍幫丁顧此失彼者二
司官員俱已革退不准收用且召軍陞官比與納級陞

官者不同納級多係富豪軍民貴介子弟圖以榮身藉勢所得者小所損者大召軍之人皆生長邊方就可領軍得其實用况前項事例屢常舉行目今召募亦頗難得所以近奉明文召募官員多不及數然不如此無以警勵人心如蒙乞勅兵部叅詳議處合無量照前項奏行事例見任官員百戶召一百名與陞副千戶副千戶召一百名陞正千戶正千戶二百五十名陞指揮僉事指揮僉事二百名陞指揮同知指揮同知二百名陞指

揮使而止俱月加俸糧一石其總小旗名軍一百名者
合無照例陞級舍人名軍一百名者與做冠帶小旗後
有軍功俱照級陞授其名軍不及原擬之數照臣原擬
扣數給與銀兩以酬其勞所名軍人待查發衛所收伍
之後不拘馬步每名給銀三兩置備軍裝什物俱於太
僕寺馬價內支用若有不敷於陝西司府庫內取給合
用盔甲軍器於固原平涼附近官庫內查給編籍已定
擇其稍有丁力者給領馬匹於銀買及監苑茶馬內隨

宜撥給固原衛紅古城等處各就與關支糧賞白馬城
軍人既已撥給地方耕種合照屯種軍餘則例禦冬及
有警收操與支口糧每月四斗五升無事疎放農種如
此則可以壯實邊城保障地方實為便益緣係整理邊
務以備敵患事理未敢擅便為此具本順差承差趙瑤
親齋謹題請旨

一為再乞天恩辭免新命容令休致事

奏為再乞天恩辭免新命容令休致事先准吏部咨嘉

靖四年十一月十八日該司禮監太監張欽傳奉聖旨
提督陝西三邊軍務楊一清便寫勅行取來京著照舊
內閣辦事吏部知道欽此欽遵備咨到臣已經披瀝誠
悃乞恩辭免容令休致俟命間本年閏十二月初三日
欽奉勅令特命爾照舊內閣辦事勅至爾即馳驛來京
毋得稽違故勅欽此欽遵除望闕叩頭祇受扶病就道
外天地之恩非意所及臣子之分省躬而驚謹再瀝誠
悃者伏念臣少時患目久而昏眊中年之後百病交攻

正德年間承乏吏部薦登內閣在告之日多在公之日少懇求休致至二十餘章始遂優閒之願皇上光臨大寶特承眷注既而言官交薦廷議見推忽有提督陝西三邊戎務之命勅使臨門迫於大義不敢不起到邊以來倏經十閱月矣弊筋力於戎馬之間竭精神於籌畫之際凡所當為不敢不勉所謂鞠躬盡瘁死而後已者臣之心也頃自巡視延寧等邊兩目為風沙所傷赤痛昏澁數步之內不能辨人面目把筆作字點畫不分一

切奏牘文移止是口授吏人謄寫又兼足膝愈加痿弱步履非人攬扶動欲歌仆所以未即求退者良以套人去留未定恐貽西顧之憂耳豈意殊恩自天而降使臣進退失據無以自容臣聞之古人云陳力就列不能者止又曰知足不辱知止不殆臣體力已憊安能就列分量已足自當知止若不自揣度匍匐入朝蹣跚於闕門之下顛仆於殿陛之前豈不重貽班行之笑臣雖無似出處之義亦所素明安能以垂盡之年播此醜態於人

人哉比聞言官論臣者竊念臣曩官中外粗効馳驅晚
登樞要實無裨補招尤速謗理所宜然言官與臣非有
睚眦其所指摘必有憑據縱使失真過當蓋亦聞諸道
路之訛傳惑於流言之萋斐臣不敢辨亦不當辨况公
論在臺諫宜有異同公道在人心終當底定亦何俟愚
臣之贅言乎且臣今年七十二歲凡在班行無如臣之
老舉進士至今五十有四年凡登科第無如臣之深加
以疾病相仍生存無幾而乃蒙恥居官覲顏任事是舉

其平生而盡棄之矣伏望皇上玄造曲成離明普照察臣之言出於肺肝憐臣之力不堪鞭策早降俞音容令致仕得與田夫野老歌詠太平則自今以往未死之年皆再造之賜也臣慚負天恩罪當萬死緣係再乞天恩辭免新命容令致仕事理為此具本順差承差趙瑤親齎謹具奏聞伏候勅旨

一為舉用將官事

題為舉用將官事臣切惟當疆場之任新進不如舊人

成戰伐之勲使功不如使過蓋舊臣宿將衷情邊務既熟知於已風聲氣槩又素孚於人不言而自信不令而自行較之新進初士徒以弓馬為技敏銳為長者迴不同矣今之將官皆出廷臣所推薦朝廷所登簡類多英傑臣不敢槩舉姑即陝西各鎮言之博訪得先任寧夏總兵官右都督邵永謀足以禦侮折衝勇足以摧鋒破敵規模濶大識見超偉若當提督之任必有駕馭之能先任寧夏總兵官都督潘浩先任鎮守陝西都督劉淮

俱練達有統馭之才壯勇有敵愾之志去任年久至今
寧夏之人猶稱邵永潘浩陝西之人猶思劉淮先任鎮
守貴州署都督僉事陳珣生長邊方久更任使閒於軍
旅習於戰鬪此四人者邵永潘浩劉淮見蒙任使但恐
未究其用陳珣則以病乞歸今病痊疴精力尚健似皆
可備陝西三邊主將之選臣又切思人才難得自古為
然指垢摘瑕世無完名之人取長舍短率多可用之士
故合抱寸朽工師所不遺以二卵棄千城之將古人所

惜且如延綏都指揮僉事高時瞿江榆林衛指揮僉事
卜雲涼州閒住都指揮同知楊佑陝西西安後衛帶銜
都指揮同知李佐昔年或為叅將或為遊擊因事廢黜
投閒已久皆驍健善戰曉暢軍情邊人稱道舉無異辭
臣嘗取至軍門委用察其年力俱足有為使之終身廢
棄誠為可惜授以偏裨之任責効將來使功不如使過
必當有所建立如蒙乞勅兵部叅之輿論除卻永見守
重地非有三邊提督重權難以輕動外其潘浩等三員

遇有陝西延寧甘肅主將員缺乞為上請推用以慰邊
人之心高時等五員亦乞早為湔洗量加錄用各官感
恩圖報自能勉立事功以蓋前日之愆而他日干城之
任亦有攸託矣臣今奉勅取回已離邊鎮但念以人事
君大臣之職所知所見不敢不言伏惟聖明裁察緣係
舉用將官事理未敢擅便為此具本順差千戶楊評親
齋謹題請旨

一為公舉將材以備任用事

題為公舉將材以備任用事臣聞禦戎無上策自治為上策用兵無良計選將為良計將者三軍之司命將得其人怯可化勇弱可化彊將非其人兵雖衆不足恃今天下敢戰之兵無處無有而統兵之將不盡得人兵勢不振邊患未寧實由於此臣受命提督陝西三邊軍務又昔年叨任經略巡撫總制提督久官陝西今大小將官非舊時之部曲則部將之子孫頃自起廢到邊以來躬親較閱察戎務之修否驗軍情之向背知之頗真茲奉勅取回凡

所見聞豈敢隱默除見任主將及曾經臣論薦并新任
資淺者不開外切見延綏遊擊將軍署都督同知張鳳
驍勇果毅屢立戰功延綏副總兵官署都督指揮僉事
趙瑛老成持重善撫士卒分守涼州右副總兵署都指
揮僉事周尚文廉以律身嚴以御下皆可當主將之任
延綏遊擊將軍署都指揮僉事劉淵分守寧夏中路左
叅將都指揮僉事苗鑾分守延綏西路左叅將都指揮
僉事袁聰甘肅遊擊將軍署都指揮僉事嚴鎧俱英敏

知兵雄赴善戰可以充副將之選綏德衛指揮使安世
軍門奏帶頭目直隸鎮江衛指揮僉事陳岳生皆學本
儒術而兼曉夫兵機才堪幹濟而尤長於守已他如寧
夏廣武營協同分守指揮使楊時守備平邊城署指揮
史經守備邵綱堡署都指揮同知王効延綏舊安邊營
把總慶陽衛指揮使崔嵩綏德衛指揮僉事彭械俱生
長邊方而武藝素諳曾經戰鬪而勇略可取凡此數人
任有淺深皆可任叅協守備等官稍加更歷他日欲求

將領宜無出此如蒙乞勅兵部再加訪議遇有相應員缺將各官量加推用於邊方戎務必有所裨補緣係公舉將材以備任用事理未敢擅便為此具本謹題請旨

一為舉劾分守將官事

題為舉劾分守將官事照得寧夏中衛孤懸河外相離鎮城三百餘里切近賀蘭山敵人不時窺伺分守叅將必在得人臣先年提學總制俱曾親歷其地彼時分守叅將如韓玉馮楨輩俱有將略善於撫馭以此邊備嚴

密士馬精強山後之賊不敢侵犯近年邊備不嚴軍威不振官襲偷墮之風軍苦征求之累訪得見任左叅將都指揮同知蘇勇猥瑣無能闖茸不職以營求為得策視戎務為等閒以致上玩下慢紀綱縱弛威令不行敵人入邊往往失事及又訪得守備西寧署都指揮僉事彭濬守備靖邊衛都指揮同知辛忠皆持已廉慎而閑於軍旅馭衆嚴明而著有聲稱堪任分守將官如蒙乞勅兵部再加訪議如果臣言不妄乞將蘇勇革回原衛

帶俸閒住仍乞於彭濬辛忠內奏請簡用一員充左叅將分守寧夏西路地方則軍民有所依仗而得安其生敵人知所畏憚而不敢侵入地方幸甚緣係舉劾分守將官事理未敢擅便為此具本順差千戶楊評親齎謹題請旨

一為傳報回賊聲息事

題為傳報回賊聲息事准兵部咨該臣題該本部覆題看得提督陝西三邊等處軍務兵部尚書兼都察院左

都御史楊一清題稱分守肅州右叅將雲冒撫夷指揮
劉雲等會審得通事馬能等供稱王子蘇勒坦莽蘇爾往
土魯番去了有頭目雅穆拉在哈密住到七八月裏馬
壯領哈密北山衛喇特黃毛部等衆要往漢人地方上搶
掠今甘肅地方兵馬寡少錢糧空乏已將先任總制都
御史李鉞奏帶用剩馬價寄放苑馬寺庫內銀二萬七
千七百三十九兩四錢七分內先支五千兩給與西寧
莊浪官軍買馬騎操及查甘肅延綏鎮城等處馬匹亦

合量為查補乞勅該部再於太僕寺馬價內動支五萬兩分給一節是固先事預防安邊定寇至計為照各鎮節年奏討馬匹馬價數多太僕寺馬價所入有限而所出無窮況連年因南北直隸等處災傷停徵減派馬匹馬價徵解不全一旦空虛緩急無備尤為可慮但稱彼中多事緊急用馬亦合量給及照前寄陝西苑馬寺馬價銀二萬七千七百三十九兩四錢七分原係本部給發太僕寺馬價仍候本部明文動支之數合無再於太

僕寺馬價內動支一萬二千二百六十兩五錢三分共
輾該銀四萬兩候命下之日本部差委官一員領出太
僕寺銀兩運送陝西布政司交割其見在苑馬寺寄庫
支剩銀兩一面移咨都御史楊一清差官前去領回悉
聽本官從便計處買補馬匹給與無馬官軍騎操仍將
領過銀兩數目買補過馬匹毛齒并領馬官軍姓名通
前一併造冊繳報等因題奉聖旨是欽此欽遵備咨到
臣案查先為前事已經具題去後今准前因查得先據

陝西苑馬寺呈報前總制都御史李鉞奏討馬價支剩銀二萬七千七百三十九兩四錢七分收貯本寺官庫續因各邊將官呈請缺馬數多已該臣行令該寺將前項銀兩委官解送固原軍門轉發固原州倉收貯續據固原兵備副使朱冕呈開節奉臣明文支給過寧夏中路叅將苗鑾二次領銀四千四百兩莊浪副總兵魯經領銀五千兩陝西遊擊將軍陶文二次領銀六百五十兩環慶守備都指揮李勲領銀一千五百八十兩延綏

遊擊將軍劉淵領銀一千三百三十兩寧夏東路叅將
劉謹領銀二千兩新任叅將魏錕領銀二千兩甘肅遊
擊將軍嚴鎧領銀一千二百三十兩涼州副總兵周尚
文領銀一千二百三十兩延綏副總兵趙瑛領銀一千
三百三十兩寧夏興武營協同都指揮吳雲領銀九百
兩蘭州守備都指揮王錦領銀六百二十兩靈州守備
指揮沙金領銀三百九十三兩四錢七分俱經行令各
官每銀十兩買馬一匹給付軍人精銳貧難無力買馬

及曾經買補二三匹以上軍人騎征及差委安西衛千
百戶沈鳳等解送西安府銀一千兩平涼衛指揮甘瑞
解送鳳翔府銀一千兩千戶李璽解送鞏昌府銀一千
兩西安左衛百戶楊威解送臨洮府銀一千兩平涼衛
千戶施文解送平涼府銀一千兩俱經行令各府將販
賣商人名下馬匹收買節據各府解送買完馬共五百
二十匹并軍門陸續買過商人及套中走回人口騎回
馬匹銀共八十六兩前項馬匹俱經相兼前項銀兩派

給陝西延綏寧夏奇遊等兵領回取各領過銀兩買過馬匹毛齒及領過馬匹給過軍人姓名造冊俱未回報兵部所擬前項支剩銀二萬七千七百三十九兩四錢七分俱已支用盡絕今照兵部續發太僕寺馬價銀一萬二千二百六十兩五錢三分咨稱解送陝西布政司收貯係臣原擬聽給延綏甘肅二鎮買馬支用但甘肅一鎮節因地方回賊侵掠缺馬數多及查延綏一鎮已該臣陸續給過各枝官軍馬共三百三十四匹銀共一萬

三千三十兩比之他鎮其數已多合將前銀分派甘肅
八千兩延綏四千三百六十兩五錢三分已經移咨各
該巡撫都御史差官前去陝西布政司照數支領及行
令該司候各鎮差官至日查照給發領回聽各巡撫官
給軍買馬騎征將領過銀兩數目買過馬匹毛齒并領
養軍人姓名造冊徑自咨部查考及將前項陝西苑馬
寺解到支剩馬價銀二萬七千七百三十九兩四錢七
分節經臣支給各邊將官銀兩并收買派給馬匹備行

固原兵備副使桑溥會同分守叅將劉文督催各該將官將買過馬匹毛齒及領養軍人姓名類總造冊以憑轉繳兵部外今照臣欽奉勅行取回京所據前項支用過馬價銀兩數目合行奏報除備咨兵部知會查考外為此具本順差承差劉遵先親齎謹具題知

一為甄拔人材以備任用事

題為甄拔人材以備任用事臣惟薦賢為國人臣之忠以人事君大臣之職臣受命督鎮關陝將及一年一方

官員賢否悉心訪究頗得其真而於藩臬之官尤深注意除將年資頗深賢能素著者節經論薦外其到任年淺者未敢槩陳近來廣詢衆議博采公言復得二人焉敢為朝廷陳之切見陝西按察司按察使唐澤始而筭屬刑曹能詳庶獄無冤濫之辜既而擢任外臺克持風裁有老成之望持法不撓而行之以恕物論稱平守身不苟而持之以謙士林推重陝西布政司右叅政王尚綱學行素孚於人器識迴出於衆年齒逾壯而以養棄

官有急流勇退之風薦章屢騰而懇辭乃起有行義達道之志此二臣者唐澤自官憲佐十有三年任更閩浙而賢聲無間王尚綱自陞叅政一十五載身雖退遜而光價益增論其人品皆有大受之具稽其年勞亦在擢用之時如蒙乞勅吏部再行訪察合無將各官早為甄拔推用稍出乎常格則風聲可勵乎庶官緣係甄拔人材以備任用事理未敢擅便為此具本順差承差劉遵先親齎謹題請旨

一為薦舉監牧官員事

題為薦舉監牧官員事切照陝西苑馬寺先年馬政久廢名存實亡弘治年間荷蒙孝宗皇帝簡自上命臣督理大改絃轍一新政令彼時孳牧蕃息卿寺改觀二十年來官員賢否不一馬政興廢不常臣近奉命提督軍務駐節固原兵馬既事體相關監苑又臨莅之地訪得苑馬寺卿周綱久叅藩牧老成詳慎少卿郭震昔任兵憲英敏有為寺丞蔡麟拔自縣令政務疏通此三人者

皆能盡心職業修舉廢墜不失牧軍之心可收藩息之
効如蒙乞勅吏部查訪將各官酌其年勞量為旌擢庶
使凡為臣工者皆有所感發興起矣緣係薦舉監牧官
員事理未敢擅便為此具本謹題請旨

一為缺官委用事

題為缺官委用事據整飭固原等處兵備陝西等處提
刑按察司副使桑溥呈前事據固原州申稱本州係弘
治年間開設止有知州吏目二員政務繁多幹辦不前

乞為轉達添設同知或判官一員庶得濟事等因據此
看得該州地處邊方城有軍衛而總兵兵備叅將衙門
俱又常川駐劄倉場數多營堡散處勘事查盤召商糴
買委的缺官幹理今要添設佐貳一員似為相應合無
俯念邊鎮重地特賜轉達就於陝西所屬賢能判官縣
丞等官內舉陞一員前來供職則庶務可以分理地方
實為有益等因具呈到臣為照固原州原係開城縣弘
治年間始改為州所管轄多係人民內有軍衛監苑王

府功臣草場軍民雜處詞訟繁多先年止有兵備守備
官各一員後將陝西移鎮於此近又改設叅將一員況
節因邊情緊急欽命總制提督大臣多在本城駐劄上
承下移不可無人及行委查勘邊情會問罪犯查盤錢
糧踏勘地方等項必得文官協同軍衛官員行事方得
停當額設止有知州吏目各一員不敷幹辦況又時有
公差事故等項甚至全無一官副使桑溥呈稱要添不
拘同知判官一員分理委用誠非得已但地隣極邊沙

漠沍寒之區戎馬馳驅之苦新選官員多非所樂終恐
不得其用臣詢之布按二司官員皆舉稱西安府華州
判官聶淮本府同州朝邑縣縣丞紀年皆官小能守性
敏有為堪任州同知本府臨潼縣主簿馬鵬程靖邊衛
經歷司經歷鄭仲皆年壯可任勤勞才敏熟於幹辦堪
任判官如蒙乞勅吏部議處合無於固原州不拘同知
判官添設一員仍乞於聶淮馬鵬程等內陞用使之就
近到任管事則分理有人委用不乏地方實為便益緣

係缺官委用事理未敢擅便為此具本順差承差劉遵先親齋謹題請旨

一為舉用邊方官員事

題為舉用邊方官員事照得陝西八府所屬州縣皆地臨邊境烽火兵戈之虞沙塞苦寒之慘故選斯地者多不樂為見任官員多復求去其勉強在任勤敏可託者十無二三庸猥不堪者十常八九勢使然也各府除正官外同知品秩稍高責任稍重苟得其人可以佐理郡

事可以分督屬官見今平涼府缺同知一員其餘府分雖未有見缺今當朝覲述職之時恐有黜幽陟明之數若將內地官員陞用及舉人內除補恐其憚勞畏險未至任所先已灰心安能責其效用臣博訪得蘭州知州陳約乾州知州趙時皆謹飭不失其身通敏可集乎事陝西布政司經歷張賢咸陽縣知縣李仁皆才猷足以有為平易可以獲下如蒙乞勅吏部查訪遇有陝西各府同知員缺將各官陞補管事於地方政務實有裨益

緣係舉用邊方官員事理未敢擅便為此具本謹題請
旨

一為整理邊務以備敵患事

題為整理邊務以備敵患事案查先准兵部咨該本部
題該臣題前事兵部覆題內開看得提督陝西三邊等
處軍務兵部尚書楊一清查議得固原為陝西喉襟要
害之地地理平漫無險可據總兵官所統與守備官部
下官軍俱不及千數難以防守欲要懸賞召募但陝西

布政司在庫官銀不多欲查照先年該部奏行事理於太僕寺馬價銀內動支五萬兩運送前來聽臣督委都布按三司官員設法召募不拘衛所官舍軍餘村野土人民壯等項但係年力精壯騎射閑熟籍名在官願領馬者給銀五兩步軍給銀三兩令其置辦軍裝弓矢器具其或召募支用不盡亦收貯聽發各邊收買戰馬一節足見先事預防安邊禦敵至計相應准擬合候命下於太僕寺收貯馬價銀動支五萬兩本部行移太僕寺

坐委寺丞一員運送陝西布政司交割悉聽本官設法
處置召募軍士充實隊伍以備敵兵其支用不盡銀兩
亦聽貯庫遇警發各邊收買戰馬騎操事完之日仍將
支過召募買馬并餘剩銀兩數目造冊奏繳查考等因
覆題奉聖旨是馬價准動支五萬兩運送前去募軍買
馬不許浪費欽此欽遵備咨到臣續據陝西布政司呈
解太僕寺委官寺丞張玘運送馬價銀五萬兩前來隨
經行仰帶管固原兵備布政司左叅政成文轉發固原

州倉督令監收通判王相收貯聽候支取及照臣原奏
內開今各該衛所行伍空虛懸利召募相應舉行至於
隨勢給賞有功官軍亦為要務軍門若無財用則有罰
無賞何以盡人死力乞將前項銀兩聽召募賞軍支用
不盡之數聽發各邊買馬騎操續因敵衆數萬在套住
牧調取延綏副總兵趙瑛統領奇兵三千員名前來寧
夏東路花馬池等處按伏及因河西莊浪涼州等處回
賊壓境甘肅鎮巡屢奏乞發延寧兵馬該臣調取延綏

遊擊將軍張鳳統領所部遊兵三千員名在於固原靖
邊蘭州等處按伏聽調應援緣二枝人馬俱係客兵徵
調在外半年之上勞苦可憫節經動支前項銀兩差委
固原衛指揮申甫延綏遊兵指揮劉欽軍門聽用鎮撫
張淮前去量為犒賞少助修理軍裝之費給賞過趙瑛
部下官軍銀八百兩張鳳部下官軍二次共銀一千六
百五十六兩七錢俱各取具委官給散過花名數目在
官又因臣巡視寧夏延綏等邊行令帶管固原兵備左

叅政成文督委西安等衛千戶王臣等量帶前項銀兩
軍前聽用續據王臣等呈報節奉臣明文閱視兵馬激
勵官軍犒賞獲功人員優恤陣亡等項共支用過銀八
百兩肆錢及節據陝西延綏寧夏甘肅等處各該將領
等官呈稱各邊營堡官軍缺馬數多乞要查給馬價官
銀買補俱經行令固原兵備官支給續據副使桑溥呈
開支給過陝西遊擊將軍陶文下遊兵指揮周江等領
給死馬官軍銀二千六百八十兩延綏遊擊將軍張鳳

下遊兵指揮侯章領給死馬官軍銀一千三百七十兩
延綏總兵官彭模下委官千戶周文臣領回本鎮巡撫
衙門買馬銀九千兩莊浪衛百戶安能領回解到馬二
匹價銀二十四兩靈州守備指揮同知沙金領給買馬
銀一千六百六兩五錢三分管領戰鋒官軍都指揮瞿
江下甘肅管隊百戶崔玉等領給軍人買馬銀六十兩
又據整飭洮岷邊備副使翟鵬呈稱洮岷等處見有額
布勒等敵聲息緊急各該衛所城堡缺馬數多乞發官

銀買馬騎征又經移咨巡撫陝西都御史王蓋差委指
揮孟澤領解洮岷邊備官處銀五千兩聽巡撫衙門隨
宜給軍買馬支用前項支給買馬銀兩俱經行令各該
將官每銀十兩買馬一匹仍將領過銀兩買過馬匹毛
齒領養軍人姓名造冊未據呈報通查犒賞官軍該銀
三千二百五十七兩一錢支給買馬該銀一萬九千七
百四十兩五錢三分見在貯庫銀二萬七千二兩三錢
七分聽候召募支用今照臣奉勅行取回京所據前項

支用過馬價銀兩數目合行奏報除備行固原兵備副使桑溥督催各該領銀將官各將買過馬匹毛齒領養軍人姓名造冊及候召募事完之日通將買馬賞軍召募三項支用銀兩花名數目總類造冊呈報接管提督大臣查照奏繳外為此具本專差承差趙禎親齎謹具題知

一為捉獲奸細構引大勢回賊犯邊等事

題為捉獲奸細構引大勢回賊犯邊奪取地方等事嘉

靖五年正月十八日准巡撫甘肅等處地方都察院右
僉都御史寇天叙咨據整飭肅州兵備陝西按察司副
使趙載呈奉本院會案准提督軍務兵部尚書楊一清
并兵部咨俱為前事備仰本道會同分守肅州叅將雲
冒并分巡管糧二道及行都司掌印等官將前咨開衷
情務在熟思審處逐節從長計議停當明白呈來以憑
回覆具奏施行等因依蒙會同分守肅州右叅將都指
揮同知雲冒陝西布政司分守西寧道左叅議王汝舟

本司分巡西寧道僉事李孟旭甘肅管糧僉事周汝勤并陝西行都司掌印都指揮僉事王輔將前鎮巡等官都御史陳九疇等巡按陝西監察御史盧問之并提督尚書金獻民後先論奏并該部覆奏吐魯番哈密敵情逐節督同甘肅撫敵指揮丕勒瑪爾喀木通事薩里等從長會議得吐魯番自永樂年間以來通貢世受我朝厚恩成化十九年以後敵首蘓勒坦阿里子阿哈瑪特日漸生事擄哈密王母殺哈尚執善巴誘拘蘓勒坦伊蘭

奪占哈密金印城池為患已非一日大抵皆是哈密回
回唆使亦嘗遣將征剿亦嘗閉關絕貢然而一面請罪
一面侵掠迄無寧時弘治以前止於騷擾哈密正德年
來哈密已為彼有沙州被其誘挾而川邊王子莊齊勤
苦峪柴城兒扇馬城大草灘等處屬番俱被殘破趕逐
離散投赴我邊肅州臨近依住正德十年直至肅州戕
殺將官去歲又入甘州圍困城堡聲言要奪地方勇悍
難治未經訓練之兵恐難迎戰雖用成湯故事命將出

師聲罪致討窮兵黷武使無噍類未為不可朝廷不欲
勞兵動衆從事遠征且以彼么麼醜類不足深較以此
因其侵擾則閉關以示絕因其悔罪又許貢以示恩蓋
自古帝王制馭邊人之道服則懷之以恩叛則懾之以
威類如此也今本酋稔惡不悛新犯我邊本鎮巡所奏
廟堂大臣所以閉關絕貢無容復議而論者又有諸敵
無罪不宜一例謝絕之說蓋往年哈密未破之時諸敵
入貢皆憑彼處番文可辨各敵種類今哈密無王無印

西域諸夷惟土魯番最強凡入貢之夷皆經其地中間
番文真假與夫是否別國皆莫能辨若不一例謝絕必
不能保吐魯番之不詐入且一例絕之使諸敵皆歸怨
於彼亦足以離其黨而孤其勢不必以此疑阻其各種
敵人除謀為內應舍音和珊等一百六十七名搜出私
書藏有兵器事跡顯露者先已奏行巡按御史詳審情
真罪當照例轉詳待報處決如有冤濫即與辦理已有
施行茲不復議其原發涼州等城監候各起進貢并貢

回哈密土魯番夷使查得涼州寄監哈密衛進貢回人
正使密里斯拉實達爾陝西丁阿卜吉斯阿卜都拉哈滿
呼達拉斯們拉呼里瑪哈穆特唐格庫里阿卜都烏拉瑪哈
瑪特展德呼默色扎木丹扎木德呼默色阿卜都和卓
等一十五名副使哈智呼爾班達巴巴伊斯滿拉瑪哈木
瑪哈瑪特們拉瑪瑪達里阿迪斯納蘇們拉實迪克恩
都伊斯瑪音阿拉奇爾迪巴巴和新阿卜都哈里茂巴爾丕勒
瑪哈瑪特瑪瑪達里等一十五名共三十名并舍音和珊家

丁哈喇岱爾等五十一名口該前巡撫都御史陳九疇案
行本衛轉發巡按陝西監察御史盧問之處內將密里
斯拉等分發蘭州臨洮府鞏昌衛三處寄監方物現
收貯涼州衛庫將哈喇岱爾等分發鞏昌府蘭州階
州秦州禮店千戶所五處寄監復吊查陝西行都司
嘉靖元年十月起至嘉靖三年六月止陸續起送過
賽瑪爾堪天方土魯番哈密衛進貢使人文卷底冊內
賽瑪爾堪圖爾遜等一百五名天方國母巴刺丹等一

十九名土魯番正使們拉阿卜都拉們拉呼爾班達和卓
阿哈瑪特們拉瑪哈瑪特蘇勒坦庫里扎木丹穆爾圖拉
和卓和新阿里們拉裕蘇卜等一十名副使伊斯哈迪爾雅
爾和塔拉和卓唐格庫里和卓阿哈瑪特穆爾圖拉呼達奇爾
迪寶哈努爾鼎們拉瑪哈瑪特德呼默色瑪哈瑪特等一十名使
臣密爾咱阿里蘇勒坦阿里呼達阿里和卓瑪哈瑪特羅密
們拉瑪呼勒鼎噶爾丹茂巴爾等七名從人哈濟一名共三
十八名哈密衛正使們拉烏魯斯們拉瑪哈瑪特和

卓阿哈瑪特等三名副使們拉阿繖阿哈瑪特薩迪等三名使臣巴延塔克茂巴爾約勒阿實奇齊克賽特哈瑪爾和卓瑪哈瑪特和實哈特伊斯堪達爾們拉和卓呼達恰爾迪哈瑪爾哈瑪爾茂巴爾哈達呼爾班達阿里德呼默色瑪哈瑪特呼拉庫里哈瑪爾丹賽特哈瑪爾和卓多斯拉沙庫里庫里瑪哈瑪特沙哈瑪爾哈瑪爾阿里恰爾迪卜德呼默色協瑪哈瑪特庫里瑪哈瑪特呼都哈達阿哩干德呼默色唐格恰爾迪達里德呼默色等三十一名共三十七名

查得莊浪止有現監貢回哈密人瑪哈瑪特等一十五名
天方國進貢使人母巴刺丹等三名賽瑪爾堪貢使
圖爾遜等五名永昌衛見監賽瑪爾堪貢使人一
名巴莽其餘屢行陝西巡撫衙門及隴右關內關西
等道查勘未報中間恐仍有在河南北直地方及在
京潛住者無從查報內見監臨洮府蘭州鞏昌衛哈
密正使密里斯拉等十五名及見禁莊浪衛哈密使
人瑪哈瑪特等一十五名中間如有姦黠官吏等亦

不盡知難以審辦相應與舍音華珊家丁哈喇岱爾等俱照先年事例遷發兩廣安置其吐魯番進貢未回夷人二十八名及哈密衛進貢回還除見監外尚有未回夷人二十二名恐俱在沿途及在京潛住中間姦黠亦難遙定合無通行在京四夷館及北直隸河南陝西地方如有各夷潛住查將吐魯番正副使使臣從人滿刺阿都刺等二十八名哈密衛先次正副使滿刺俄陸思等六名俱一體遷發兩廣安置其餘見監蘭州等處哈

密衛副使哈只虎兒班等一十五名并未回使臣拜言
答等俱且不必督發出關俱暫安置腹裏地方以繫其
心數年之後另作議處其冒稱賽瑪爾堪天方國使
在嘉靖元年起送者止據莊浪永昌衛申稱寄監土陸
孫等九名其餘想亦在沿途潛住嘉靖三年六月起送
者計今亦已到京中間詐冒無憑審辨但彼既以進貢
而來我既驗放出關若又置之於法實非中國以誠信
待四夷之道兵部尚書金獻民所奏誠為得體候各夷

到京量加賞勞以慰其心事畢作急督發并行沿路官
司將先次貢回二處夷使在途延住及莊浪永昌寄監
者陸續驗放出關遣歸本土如此足以見我朝處待外
夷善惡各有區別使吐魯番哈密姦回聞之有所懲創
畏懼矣今將前項緣由呈乞照詳等因及准分守肅州
右叅將都指揮同知雲冒手本亦同前因據此案查先
准提督軍務兵部尚書楊一清咨前事并整理邊務以
備寇患事俱經會行各官從長議處去後今據前因會

同鎮守太監董文忠總兵官署都督同知姜奭協守甘
州左副總兵趙鎮看得各官所議閉關絕貢及處置吐
魯番哈密進貢回人使并舍音和冊家丁與天方國
賽瑪爾堪進貢回人等項事宜頗為詳悉揆之國體
夷情似為允當職等復議得自古懷柔遠人自有定體
我朝撫待四國亦有常道前項所議乃一時權宜之處
亦非經久之計也蓋吐魯番於我中國所利甚多若終
於拒絕不與通貢則失其所以為生彼亦不能帖然安

靜必將時復遣兵騷擾邊疆我邊疆亦無寧時也所以我朝自永樂以來不絕其貢及後來雖嘗閉關而復許通者蓋以堂堂天朝天覆地載其撫待四國之道不得不爾亦欲我邊疆寧謐免彼騷擾也況我邊疆之守與不守係於邊備之修與不修初不係於回人之通與不通使我邊備誠修回人通亦可不通亦可使我邊備不修通固不可不通愈不可況干羽文德聖經明訓厚往薄來前賢格言雖事勢古今異宜而道理初無二致土

魯番酋所以敢屢肆逆命者姦黠譎詐固敵國之常性
然以正德年來之事觀之我亦有可乘之釁也為今之
計惟在修我邊備使糧草充積士馬精強城堡堅完烽
火嚴明彼來求和則責以大義峻詞謝絕彼來侵掠則
整棚兵馬痛加勦殺使彼求通不得侵掠無獲數年之
後必悔罪納款還我哈密歸我搶掠男婦度其誠懇姑
容入貢既通之後必須查照祖宗舊規處待有道使彼
無詞可借無隙可投如此庶恩威兩盡不悖古人柔遠

之道回人可保不復為患我邊疆亦得以省事矣緣係處置敵情重大事理為此合就備咨前去煩請裁處具奏施行等因備咨到臣案查先為捉獲姦細搆引大勢回賊犯邊奪取地方等事准兵部咨該巡撫甘肅右副都御史陳九疇題內開會同太監董文忠議得吐魯番之所以敢犯甘肅者其至也有因而其來也有漸所以致其因與漸者吾自為之也何謂因哈密之種有三而回種居一土魯番既因哈密之回以取哈密得不因回

種之寄食甘肅者以取其甘肅乎何謂漸吐魯番日益
彊大既因回種以吞哈密而其種類復蕃於我土移其
所吞哈密者而蠶食乎我非其漸乎設使當時守土之
臣能遵奉太祖高皇帝勅旨不容回回入貢容之入使
不得至京師則我中國地方之肥美人民之富庶倉庫
之虛實士馬之彊弱彼何由而知無由知則彼欣慕輕
侮之心不敢生而今日侵犯之事何由以作乎惟其失
處廢防容其入貢焉縱其商販焉遲其歲月而不加催

督任其還往而不設禁革我之虛實美惡彊弱盛衰無不目擊周知其意謂河西可以計取中國可以漸圖也臣等故曰所以致其因與漸者吾自為之也臣等請原始要終為陛下極言之昔者哈密托克托後王母當國部下回種構連吐魯番將王母殺之逮哈尚立國部下回種曰瑪哈穆特達哩者數人叛降土番夜半獻門又將哈尚殺之其後善巴繼立瑪哈穆特達哩詐充賽瑪爾堪使進貢獅子領賞回還見哈喇輝輝和爾頭目迪里密實

等輔佐善巴駸駸然有強盛之勢乃謀糾土魯番哈密之回夜殺迪里密實并其黨與三十餘人其年各復引阿哈瑪特襲取哈密奪圖喇執善巴以去恩克保喇來奔而哈密遂入土番其舍音和珊們拉喀三雖冒中國都督之名其實皆土魯番之陪臣也中國惟繫縻之而已中國豈能繫縻之振之以威力濟之以恩施能繫之耳朝廷因其執善巴而奪哈密也令文武大臣撫處之阿哈瑪特復出悖言逆命不聽朝廷震怒始閉關絕貢已而

阿哈瑪特悔過方送還善巴此後貢路復通而肅州之寄
住奸回滋蔓益多回賊之意蓋欲以取哈密之術取肅
州而肅州守臣墮其計中殊未有能悟之者關外內附
夷人數被遣發時或漏其機緘及今見監奸回薩里等
數十人每於醉後笑談王子來時某人宅好吾居之某
人妻美吾取之往往為漢人曉番語者所覺其後土魯
番亦有插旗甘州城頭之說鎮巡上其事朝廷命總制
彭澤來撫處之回賊慮其志之不得以逞也遂納款獻

印以緩我師遣賈回進貢以釋我疑貢使未入金城而賊兵已過嘉峪豈非欲因肅州寄住姦回憑其內應而期欲痛飲酒泉之意乎逮夫番文搜出姦謀敗露姦黨就擒彼遂搖尾乞憐再四請和乞通貢路不知彼何為而來既已殺吾將而覆吾軍又何為而去復欲盟舊好而開貢路乎於此亦驗其有所因矣逮去肅州姦回盡發甘州鎮巡方議罪上請欲將進貢并沿途買賣賈回比照先年事例籍其財物乞發兩廣舍音和珊乃以應

該沒官之財輸納權倖之門遂使事體反覆刑法倒置
姦回因而近倖守臣盡數下獄致令吐魯番在京進貢
賊回私相告語曰今數塊無用之石投於權勢之門而
事變一至於此顧吾囊中之玉尚多吾王從此雖十犯
邊而吾屬無恙矣夫使夷人重玉石而輕犯邊是誰為
此厲階耶千古有餘羞矣此後姦回近倖於朝吐番肆
志於外昔日犯邊之賊變而為進貢之客轡聯轂擊款
嘉峪而求入矣為鎮巡者燭義不精怵於利害之途自

謂回人一左右足而吾輩遂有安危所以擡手聽命館
為上客莫敢誰何至是一馬之飼日費斗菽千百成羣
三四年間可勝浪費所以西域賈回視甘肅為公館笑
中國為無人蔓引滋植恣肆交結以致甘肅內外久住
漢回揣摩盛衰料度向背構連接引以有今日孰謂回
賊之欲取甘肅者不有所因而其來也無漸而其所以
致其因與漸者不由吾人自取之耶今蘓勒坦莽蘓爾雖
欲借姦回以取甘州然其意不曰中國貴吾玉吾事之

不成顧吾有玉在况吾貢使絡繹京師左右近倖可以
賂遺守邊大臣可以貨殺讒諂而貢路豈能我絕乎此
所以哆然為惡而不之恤者良有以也為今之計固不
能如武帝之振威以勤二師之兵亦當效光武之閉關
以絕西域之貢倘或涵容隱忍不能執義斷決再使姦
回賁緣穴隙復如往日之事十數年後臣等恐祖宗河
西十五衛所之疆場必見易於吐魯番數十百塊之頑
石矣可不惜哉可不慎哉臣等長慮却顧必欲永保河

西惟有閉關絕貢而已閉關則我有益絕貢則彼受害
何謂益在邊則寄食省而軍餉不費在途則貢餽省而
驛遞不擾在朝則賞賚省而財用有餘吾其不受益乎
彼絕貢路彩段不去則彼無華衣鐵鍋不去則彼無美
食大黃不去則人畜受暑熱之災麝香不去則床榻盤
虺蛇之害彼日用之所不可無者又不止此一旦貢絕
一物不出彼其不受害乎吾持此有益之柄而彼蒙受
害之實吾不能持吾柄而屈彼之膝而反事武之虛張

而受彼之禍為計不已拙乎夫誠能謝絕必須防範捍
外衛內去心腹之疾何謂心腹之疾內應姦回無慮二
千餘人在監禁者臣等已置之於法扭其手足置之桎
檻縱彼為虎為兇保其不能為患必矣至於節次進貢
之人在京在途或往或來無慮數百哈密土魯番之人
雖處以極刑亦不為過但中間冒名天方等國者亦多
真偽難辨臣等欲將冒天方等國者分處腹裏地方不
必起送還國暫住數年另作議處至於分發涼州等城

見監各起進貢并貢回哈密吐魯番夷使欲乞查照先
年事例差官隨處籍其財物一併遷發兩廣地面或安
置充軍其甘州見監內應姦回行令巡按御史再行覈
實速賜殛誅各犯妻女不為常例或給本邊極貧軍人
領配或解京給付功臣之家為奴如此則病根悉拔賊
回失所憑藉而心腹之患可除矣等因奏奉聖旨兵部
看了來說欽此欽遵該兵部覆題奉聖旨是便會官從
長計處來說欽此行間又該巡按陝西監察御史盧問

之題為懲敵患以圖保重鎮事臣聞自古制馭邊人之道服則綏之以德叛則震之以威此不易之論也邇者吐魯番王子蘓勒坦莽蘓爾聽其謀主和卓塔濟迪音雅穆拉糾合諸種回夷攻圍甘肅地方其意實欲取甘肅也何者以彼而言勢驅沙瓜姻連衛喇特借名諸番擁衆二萬詭言搶掠謀非一日又以甘肅寄住各種回人如已獲舍音和珊等一百六十餘名俱為傳報消息作為內應彼此合謀一旦驟至所以敢于侵肆者亦有其由自

成化年間土魯番蘇勒坦阿里擄哈密王母金印命兵往討不進而歸夫哈密朝廷之所封也為中國之藩籬通西域之出入達諸國之消息而土魯番敢于遷滅失此不討此土魯番所以輕中國之始也其子阿哈瑪特嗣之又踵前風將朝廷所封之哈尚又殺之乃遣使入貢求封為王其悍傲輕慢甚矣亦置之而不問弘治年間自察遜衛訪其遺孽善巴而立之阿哈瑪特又擄去瓜州凡此多哈密都督舍音和珊背哈密而結構土魯番之所

為也土魯番三次輕侮中國而在朝諸臣未嘗專為建
議閉關絕其貢路或雖絕而即通以致今日使西域賈
回圖利中國以玉石鑛銕等項無用之物往來神京厚
蒙賞賚凡段匹鐵茶彼之難得日用之不可缺者舉得
輸入西域矣視之為賔而任其騷擾驛遞暗藏其姦而
得以睥睨中華是甘其大欺而貪其小餌也弘治正德
年間嘗命大臣累次經略撫處重立善巴歸復金印或
拘其使而復遣之或留其衆而羈縻之俱不過聊醫目

前之疾黠驚夷性仍假貢物以窺中國緩兵機而圖後舉是以正德十一年之侵犯甚於弘治七年而今年之侵犯又甚于十一年也自此以往若再受其貢物之餌略其犯順之罪惟事撫處欲結其歡心肆其憑陵而通其貢路則河西數年之間恐為土魯番所有矣回賊性最譎詐志得則稱兵犯順勢屈則乞賞求通其貪取地方輕慢中國其本心也今歲幸賴聖明威福天兵遠震守臣雖昧先事之備亦有捍禦之功攻圍甘州而殲其

酋長追逐于張欽堡而斬獲頗多止是剽掠地方未至
失陷城池然堡寨被其攻刦人民被其搶殺室廬被其
焚毀產業被其蕩析河西生靈之厄亦已甚矣今雖遭
剽失利而歸能保其明春不再侵犯我邊乎侵犯勢勝
則長驅刦掠塗炭我疆宇不勝則討賞聽撫復講進貢
仍以其玉石鑕銼之類罷中國之驛遞以供之廣布姦
回乘機肆隙豈肯終能賓服乎為今之計將欲興師遠
討則中國之兵馬錢糧日見消耗各鎮不寧凶荒屢奏

斷難舉也莫若閉關絕貢永不與通但閉關絕貢議者
以為土魯番可罪矣而諸夷未得罪也一例絕之恐衆
敵于我以臣觀之土魯番橫行西域雖天方國賽瑪爾
堪等皆聽其驅制縱使稱貢亦求路於此抑或者近日
所貢獅子西牛西狗等物亦土魯番假冒其名以誘中
國耳今日止曰邇者土魯番糾衆敢犯甘肅逆天道背
國恩今絕其貢方命守臣整兵往問其罪諸敵效順者
亦暫止入關恐叛服難別俟數年察其情偽再行議貢

則亦未嘗直拒於諸敵諸敵或者結怨於土魯番矣待
甘肅之士馬差強潛住之姦回淨洗元氣充養邪惡驅
退待乏其常物之用屈其悍慢之心困絕之久入我範
圍然後徐議之或要其立哈密而為甘肅之蔽或斥其
守封疆而開沙瓜之境縱使入貢必使處寓有所而交
易有時稱進有防而遣歸有限未若今日回漢雜處守
臣朝議於公府姦細夕達於種類幾釀成今日內應之
變也既絕其貢將掣獲姦回舍音和珊等俱各再審無

異依律處決其餘進貢及寄住甘肅者各訪別意向或
布處陝西各邊或遷徙兩廣福建等處所貢獅子西牛
西狗皆解其檻而縱之關外甘肅地方儲積糧草閱實
軍馬但遇侵犯即行征剿則回賊之患庶乎可除而甘
肅重鎮方可為國家有矣等因奏奉聖旨兵部知道欽
此欽遵該兵部會同太保兼太子太傅武定侯郭勛等
吏部尚書廖紀等覆題議照招攜討叛聖王馭戎之權
納貢稱藩外敵效順之體今土魯番雄據西域吞噬諸

敵將我朝所立哈密忠順王前後夷滅其罪已不容誅
而猶容其通貢者朝廷以遠敵醜類不足深較姑示羈
縻而已彼乃益肆奸黠包藏禍心無故興師二萬謀奪
我之地土假貢使以探虛實倚同類以為內應幸仗宗
社威靈守臣宣力殲彼太酋失勢遠遁雖城池無恙而
村寨居民不勝踐蹂似此狂狡為患邊疆縱未能勤兵
遠討豈可復容入貢或謂西域國多理難盡絕蓋今次
入寇實亦借助諸夷之兵貢道不通則中國貨物不入

西域而諸敵歸怨亦足散其黨而離其心數年之後果能悔罪復還哈密之封再為議處所據閉關絕貢揆以今日事勢宜從守臣之請不必疑阻其謀為內應舍音和珊等一百六十七名搜出私書藏有兵器事跡顯露宜寘極刑但人犯數多先已奏行彼處巡按御史再加詳審情真罪當照例轉詳待報處決如有冤濫即與辨理原發涼州等城監候各起進貢并貢回哈密土魯番夷使查得先年曾有遷發兩廣事例但今人衆難以一

際發遣合無於內量為查審奸黠頭目數十人及舍音
和珊遺下家丁哈剌岱爾等五十一名俱發兩廣地方
安置其餘隨從夷人并盤出大黃頑石等項及隨身財
物俱令帶回并冒稱賽瑪爾堪等國敵使通行所在官
司差官撥軍逐程管送出關不許沿途延住但臣等今
日會議止據所奏叅酌處分而事情隔遠未必悉中機
宜為照提督三邊軍務尚書楊一清素諳邊情練習事
體合無將前項所議事情仍行本官再加審處如果相

應依擬施行中間或有窒碍應合另處者徑自具奏定奪等因題奉聖旨是這所議事情還行與楊一清著再加審處奏來定奪欽此欽遵備咨到臣行間又准兵部咨為整理邊務以備夷患事該提督軍務本部尚書金獻民題前事內一件議處回夷照得土魯番回夷僻在西隅其人貌惡而心險自漢以來叛服不常我太祖高皇帝奄有萬國制誥不許回回入貢蓋深燭其情而洞其心也永樂後始復來貢一時守臣失於防微縱其商

販馬匹而不知禁任其遲延歲月而不知促由是我之
虛實險易無不周知成化八年哈密王托克托故絕酋長
蘇勒坦阿里將王母并金印搶去占據其國逮後哈尚繼
立蘇勒坦阿里者弘治元年又將哈尚殺死善巴繼立
弘治七年又將善巴執去自此得慣累為邊患朝廷震
怒命將征勦閉關絕貢各東方知悔罪遣使送還善巴
由是貢路復通往來無忌而肅州寄住之回益多矣正
德年間蘇勒坦莽蘇爾大肆奸譎又將哈密王執去占奪

城印聲言要犯甘肅該前鎮巡官具奏欽命都御史彭澤統領兵馬并帶錢糧賞賜前來經略處置回賊慮其閉關絕貢照舊遣使納款獻還金印一以緩我師一以釋我疑然貢使未入金城而賊兵已過嘉峪矣臣惟中國之於外國因時納貢厚往薄來非徒得其向化之心實欲弭其侵邊之患前項回賊旋侵旋貢旋貢旋侵姦謀狡計大略如前所陳茲者天奪其魄自來構釁挫衄遠遜但彼之日用資我者甚多竊恐失利日久乞哀求

貢之請又在旦夕矣即今河西地方民窮徹骨萬一見之不真復聽入貢必將浚民之膏血為之飲食勞民之筋骨為之役使驛路騷擾雞犬不寧臣恐河西兩鎮之軍民十五衛所之疆場終當被其擾壞也臣願自今以後遇彼求貢宜下明詔聲其屢世不恭之罪閉我關門絕彼貢獻申命該鎮守謹斥烽堠益嚴兵備以待之則彼之姦謀破沮狡計無施河西垂首待盡之民庶幾其有更生之望矣又一件議處敵使照得哈密衛賽瑪爾堪

天方國等處敵人嘉靖三年內各帶方物入貢甘肅鎮
巡官陸續驗放入關已到莊浪等處住歇近因回賊擁
衆入寇各該官員恐為內應俱各禁治羈候奏請定奪
除各官訪有實跡者不敢輕議外其餘慮有變而未見
指實者臣竊有言焉夫外國之人深情厚貌內應之謀
難保必無但帝王之於邊人如天地之於萬物以誠信
為本前項夷使若以為詭譎難信始不當驗之入關若
以為舊例當貢今不當置之於法況彼以貢獻為名既

入我國而遂誅之則類於殺降外國聞之疑我誘殺使臣望風規避不肯入貢豈不自生疑二自開邊隙乞勅該部從長計議轉行甘肅鎮巡官將前項夷使再加詳審務要訊訪得真議擬允當如無指實即便差人伴送來京入貢量加賞賜以慰其心若是事出風聞情有可疑亦要省諭遣還不必深究如此庶情法不偏恩威並著敵人知所感畏而將來之患可息矣等因該兵部議查得先為捉獲姦細構引大勢回賊犯邊奪取地方等

事已經會官題奉聖旨是這所議事情還行與楊一清著再加審處奏來定奪欽此已經欽遵去後今所奏事情與本部原會官議處大略相同別難再議合仍行提督軍務尚書楊一清查照先今事理一併再加審處具奏定奪節該奉欽依准擬欽此欽遵通咨前來為照甘肅鎮巡等官都御史陳九疇等巡按陝西監察御史盧問之并提督軍務尚書金獻民後先論奏皆欲閉關不容土魯番入貢及欲查審姦回敵使遷徙發遣等項事

情追論先年之失策叅以今日之事勢斟酌情法委曲
詳盡節該兵部會官議處已有定見而朝廷又欲行臣
再加審處奏來定奪蓋聖明軫念邊方事重廣聽博納
深慮却顧必欲事中機宜萬無一失但臣雖舊曾節制
陝西諸鎮相離二十餘年人情事體恐不盡同況前項
敵人犯邊求貢等項俱係近年事情臣今初到地方見
有敵衆數萬竊伏河套窺伺方將經理陝西延寧三鎮
兵馬錢糧防禦甘肅相去尚遠未得親去巡歷古語云

終身坐談不如一時之親見彼處鎮巡重臣及守巡管糧三司官員親履其地目擊其狀知之必真合行諮訪採擇詢謀僉同庶無遺患且各種敵人除謀為內應舍音和珊等一百六十七名搜出私書藏有兵器事跡顯露先已奏行巡按御史詳審情真罪當照例轉詳待報處決如有冤濫即與辨理別無施行外其原發涼州等城監候各起進貢并貢回吐魯番吏使各官欲查照先年事例遷發兩廣地方安置充軍兵部會官又稱人衆

難以盡發要於內量為查審姦黠頭目數十人及舍音和珊遺下家丁哈喇岱爾等五十一名俱發兩廣地方安置其餘隨從敵人并盤出大黃頑石等項及隨身財物俱令帶回通行所在官司差官撥軍逐程管送出關不許沿途延住緣前項夷人不知今仍在涼州監候或又分送何處監羈未經查明其冒稱賽瑪爾堪天方等國夷使都御史陳九疇等奏內要行分處腹裏地方不必起送還國暫住數年另作議處尚書金獻民奏則以為

彼以進獻而來既驗之入關不當置之於法似合中國
所以待回夷之體但前項夷人并貢物亦未知見今羈
留何處相應查處已經移咨甘肅巡撫都御史寇天叙
會同鎮守太監總副將官及督同二司巡守管糧并行
都司官從長計議熟思審處今後吐魯番應否照依衆
議閉我關門絕其貢獻永不與通惟復中間別有窒碍
今當作何區處其監候各起進貢并貢回哈密吐魯番
夷使見在何處監候各若干名應否盡行發遣兩廣地

方安置充軍惟復查審奸黠頭目數十人及舍音和珊
遺下家丁哈喇岱爾等五十一名照例發遣兩廣安置
其餘通行所在官司管送出關其冒稱賽瑪爾堪天方
國進貢敵人見在何處應否照依都御史陳九疇所奏
該部所議一體差官撥軍管送出關歸國惟復量照尚
書金獻民所奏甘肅鎮巡官再加詳審訊訪得真如無
指實差人伴送來京入貢若是事出風聞情有可疑亦
要省諭遣遠不必深究俱早為查議作急咨報前來以

憑叅詳定處回奏月久未報又經節次行催去後嘉靖
四年十一月內臣自延寧巡邊回還套內敵衆遠遁地
方稍寧方欲親詣甘涼地方處置前事本年十二月內
准吏部咨為傳奉事奉欽依行取回京切思前項敵情
節該廷議題奉明旨行臣審處奏來定奪已經半年之
上尚未覆奏心不自安專差都指揮同知楊佑齋文前
去守催議報臣起程行至西安府華州地方方據各官
咨報前因切為吐魯番敵人蘓勒坦阿里以來種惡數

世殘滅我哈密封國據王母戕哈尚執善巴誘拘蘓勒
坦伊蘭搶奪金印占據城池為患幾六十年累朝列聖
深懷以大字小之仁兼體王者不治邊人之義文告之
辭先後繼出撫夷之使相望於道彼番逆天背命怙終
不悛嘗興問罪之師而又不忍為犁庭掃穴之舉嘗下
絕貢之詔又因其納款而許之復通致使姦回以哈密
為奇貨可居蔑中國之莫能制命數年之前戕殺肅州
將官去年復大舉深入圍困甘肅城堡聲言要奪地方

罪大惡極神人之所共怒王法之所必誅都御史陳九疇御史盧問之尚書金獻民等後先所議皆欲閉關絕貢辭義嚴正推論詳悉已經廟堂大臣叅詳稱允為今之計必當出此更復何言看得巡撫甘肅都御史寇天叙會同鎮守太監董文忠總兵官都督姜輿副總兵趙鎮等議稱自古懷柔遠人自有定體我朝撫待四國亦有常道前項所擬乃一時權宜未為經久之計吐魯番於我中國所利甚多若終於拒絕則失其所以為生彼

亦不能帖然安靜必先時復遣兵騷擾我邊況我邊疆之守與不守係於邊備之修與不修初不係於回人之通與不通使我邊備誠修回夷通亦可不通亦可我邊備不修通固不可不通愈不可吐魯番酋所以敢屢肆逆命者勇悍難制固敵人之常性然以正德年來觀之我亦有可乘之釁也為今之計惟在修我邊備使糧草充積士馬精彊城堡堅完烽火嚴明彼來求和則責以大義峻詞謝絕彼來侵掠則整棚兵馬痛加剿殺使彼

求通不得侵掠無獲數年之後必悔罪納款還我哈密
歸我搶掠男婦度其誠懇姑容入貢既通之後必須查
照祖宗舊規處待有道使彼無詞可借無隙可投如此
庶恩威兩盡不悖古人柔遠之道等因叅詳所議蓋各
官均有地方之責知敵患之難測恐兵糧之不繼將來
果有大舉侵犯兵力難以支持萬一債事貽患重典難
辭故雖不敢遽為通貢之言以拂衆論亦不能終主絕
貢之議以貽後艱度彼度已有不得不然者耳臣去年

題為傳報回賊聲息事內稱禦戎無上策自治為上策
今甘肅地方兵馬寡少錢糧空乏城堡無金湯之固戰
馬無充廩之良原額戎伍逃亡接踵而其名徒存見在
軍人饑寒困憊而其形徒在已且未治何以治人內之
不安何能攘外近詢之邊人又有不止於臣之所言者
矣且正德十一年肅州之釁將官被其戕殺兵民遭其
荼毒去年甘州之寇寨堡殘破不知若干人畜殺掠何
止數萬比之正德十一年又復數倍彼為守臣者寇之

未來既不能阻遏寇之既至又不能截剿滿其所欲得利而歸乃輕信下人之言以為蘓勒坦莽蘓爾雅穆拉俱被鎗砲打死遂以殲厥大酋之功而掩其殘破地方之罪今二酋固無恙也雖和卓塔濟迪音之死稍雪邊人之忿然既不曾大遭剋劒豈有懲戒所以去年三月復遣其酋首托克托布哈領兵數百竊伏邊境窺伺幸而永昌將官馬雲輩襲殺敗走斬其渠魁庶足稍剋其鋒況先年吐魯番之敢於殘滅哈密者皆因哈密姦回如舍音

和珊輩主使各官所論誠是也朝廷亦已明正典刑矣
而其近年之擾我藩籬肆行無忌始固有以致之後又
有以激之鎮巡所謂有可乘之釁者以此敵人節遞番
文亦往往歸咎於人夫既不能制其命又無以服其心
我能絕其入貢之路不能阻其犯邊之路倘此敵始終
不悛糾衆復入而我殘壞之寨堡修葺未完創傷之兵
馬元氣未復甘肅之地豈堪再破壞耶且腹裏人民饑
寒所迫輒相嘯聚為盜彼強盛之衆既失其所以為生

豈肯坐以待斃侵犯之謀勢所必有及照河西一線之地西寧有額布勒之賊住伏為患莊浪有後山之敵時出剽掠倘或二寇並作我之兵馬西禦回東東備敵衆不知有餘力否也客兵雖數萬可以調發而倉廩在在空虛將何取給事勢至此恐無善終之策矣臣愚請及今空隙無警之時宜因其求和行令甘肅守臣差遣的當撫敵人員同差來貢使及寄住屬番譯寫番文責諭賴勒坦莽賴爾雅穆拉等大意以為爾等棄蔑天道違背

國恩數犯不悛罪不容赦羣臣皆請調發各鎮精兵三十餘萬直擣爾巢聲罪致討天皇帝好生之德念爾東地人民亦是朝廷赤子為惡之人固自有數大兵所至誅剿無遺聖心不忍止令守臣閉關絕貢永不許通今爾屢遞番文再三求貢情辭懇切今特令人省諭爾果有悔過實心將原封蘓勒坦伊蘭送出還國將爾戍守哈密之人俱各掣回仍查近年教唆爾犯邊首惡人犯械送甘州三堂衙門明正其罪及將所搶掠甘肅一帶

城堡軍民人口盡行送回待鎮巡官奏聞朝廷將爾既往之罪一切赦宥許爾照例通貢不絕爾之衣食保全爾之生命仍將爾進貢在京在途夷人除罪惡顯著外其餘各各發遣出關歸還爾土若不依聽前言斷然閉我關門絕爾貢路倘爾復來侵擾我地方已命守臣調集大兵痛加誅剿爾悔之晚矣如此諭之庶幾開其自新之路緩其入貢之謀我得以及時修飭邊備料理兵糧若奸回不肯悔過我之內治既修寇至有以待之以

守則固以戰則克地方可保無虞矣天下之事有理有勢理經也勢權也守經而不達權原理而不及勢其不貽禍人家國者幾希矣閉關絕貢理也經也許其自新勢也權也如前所處彼縱有狂謀無詞可執所謂權而不失其經也論者動舉漢光武時事為言夫光武固嘗謝絕西域休息生民是時兵精將勇彼聽則中國晏安不聽則遣兵伐之其勢在我而不在彼今日兵將強弱視光武時何如恐我不能持其勢以臨之故不得不權

為之處也我累朝列聖豈欲甘其背慢而常撫之以恩
良以遠敵不足深較亦恐結釁於彼以勞我人馬耳夫
既不能行之於先年整暇之時而欲圖之於今日破壞
之後可乎至於處置敵人除謀為內應舍音和珊等一
百六十七名已行巡按御史詳審情真罪當照例轉詳
待報處決如有冤濫就與辨理徑自施行外其原發涼
州等城監候今寄監蘭州臨洮府鞏昌衛三處哈密進
貢敵人密里色埒等三十名及莊浪衛見監貢回哈密

敵人除病故外有瑪哈瑪特等一十四名并土魯番進貢未回敵人們拉阿卜都拉等二十八名哈密進貢未回夷人巴延塔克等二十二名都御史陳九疇等奏要照例遷發兩廣安置兵部會議又稱人衆難以一槩發遣要於內量為查審姦黥頭目數十人及舍音華珊家丁哈喇岱爾等五十一名俱發兩廣安置今據各官議稱各夷中間姦黥難以審辨相應與哈喇岱爾等俱發兩廣安置臣恐本夷日後悔過納款乞還進貢敵人無從發

遣歸國合無將舍音華珊家丁哈喇岱爾等五十一名
先行盡數發遣兩廣安置仍將見監敵人密里斯拉等
三十名又瑪哈瑪特等一十四名與進貢未回在京在
途土魯番敵人們拉阿卜都拉等二十八名哈密敵人并
巴延等二十二名俱暫且羈候腹裏所在地方待候敵
情向背已定另為議處其見監莊浪衛天方國貢回敵
人毋滿刺丹等三名賽瑪爾堪貢回敵人圖爾遜等五
名見監永昌衛賽瑪爾堪貢回敵人一名巴莽并進貢

未回賽瑪爾堪敵人九十九名天方國敵人一十六名
雖真偽難辨但彼以貢獻而來我既驗放入關若疑其
詐冒則又無實可據合行在京在途官司催促前來與
莊浪永昌寄監者鎮巡官陸續驗放出關遣歸本土其
原帶方物并隨身財物聽其領回不許官司侵剋重失
遠敵之心人情事體似為穩便然今日之所以處番敵
者非轉欲恃通貢為長策以紓後日之患也其所重在
於修內治以待之耳宜仍勅甘肅鎮巡官朝夕警惕無

忘敵人嚴斥烽堠申明紀律修葺城堡整飭器械振威武以警外夷之心明賞罰以作我軍之氣將節次發去官銀趁時廣積糧料草束務勾客兵萬餘數月支用倘有不敷作急議奏上請定奪兵糧有備則河西安河西安則關陝安而中原安矣以後敵人若果輸誠納款容其入貢宜如御史盧問之所言必使處寓有所而交易有時稱進有防而遣歸有限其始至也嚴禁邊臣不許侵其貢物而減其供應之費其既入也嚴督各該地方

不得任其遷延而勒其貿易之資衷心既得則邪謀不生貢道之通不足為吾病矣臣老矣不敢雷同附會以陷欺罔之罪謹疏其所見所聞者如此但恐精力衰耗志慮疎淺況又不曾親詣彼處地方豈敢自以為是如蒙乞勅兵部叅詳可否會官議處上請聖裁倘有疎漏未愜衆情合無仍行新任提督尚書王憲再為審處具奏緣係捉獲姦細構引大勢回賊犯邊奪取地方及節奉欽依著再加審處奏來定奪事理未敢擅便為此具

本專差承差王經邦親齋謹題請旨

關中奏議卷十七